

ԳԼՈՒԽ ԽԸ ԵՐԿՈՒ ԱՅՐԵՐԻ ՊԱՏՄՈՒԹՅՈՒՆԸ

Ռոստոմ խանը, որի մասին գրեցինք, Բագրատունիների տոհմից է։ Նրանց թագավորության անկումից և Անիի ավերումից հետո Բագրատունիների տոհմի մնացորդները գնացին Վրաստան, հարեցին նրանց թագավորներին և դարձան վրաց բոլոր գործերի ղեկավարները։ Երբ վրաց թագավորությունը վերացավ, երկիրը ընկավ պարսիկների ձեռքը, սրանք Բագրատունիների տոհմին իշխանություն տվին տիրելու վրաց բոլոր սահմանները։ Եվ Բագրատունիները աճեցին որդուց որդի մինչ այս Ռոստոմը, որ Լավարսափ անունով մի որդի սերեց իր կին Մարիամից։ Ռոստոմը նրան պահպանում էր, որ իր փոխարեն դառնա վրացիների վրա իշխող։

Մի օր առնելով իր որդուն՝ բազմաթիվ զորքերով գնաց երեւելի որսի այն տեղը, որ կոչվում է Ղարայագ, որ նշանակում է սև գարուն։ Այնպես եղավ, որ հետապնդեցին որսերին և ամենքը շտապում էին սպանել որսը։ Եվ հրացանների խառնիխուռն կրակոցներով զարկին թագավորի որդի Լավարսափին և սպանին։ Ռոստոմը վախեցավ իրենից, փախավ գնաց Թիֆլիս քաղաքը։ Նա հետամտեց իր որդուն սպանողներին գտնել, բայց չկարողացան իմանալ։ Ապա երկու մարդու դատապարտեցին՝ մեկի անունը Բայանդուր էր՝ հայ Մամիկոնյան տոհմից, որին կոչում էին Թումանեցի։ Իսկ մյուսի անունն էր Շիշուշ՝ վրացի, տոհմով Բարաթեցի։ Սրանց դատապարտեցին՝ ասելով, թե դուք էիք նրան մոտիկ, երբ նրան սպանեցին կամ դուք գիտեք նրա սպանողին և կամ դուք եք սպանել։

Ապա խոսակցություն բացվեց, հայերը ասում էին՝ վրացին է սպանել, վրացիքն ասում էին՝ հայն է սպանել։ Ապա որոշեցին սամարթելի անել՝ այսինքն դատավճռով մենամարտել, ով հաղթի, նա է սպանել թագավորորդուն։ Այս վճիռը հաստատվեց նրանց միջև, որ երկուսով միայն դուրս գան։ Պատրաստվեցին, հագան ռազմի հագուստ և զինվեցին զենքերով, համբուրեցին թագավորի ծունկը, անցան Կուր գետի այն կողմը՝ քաղաքի արևելյան կողմը։

Իսկ վրաց նենգավոր ազգը հրապարակավ խրատ տվեց երկուսին էլ, երբ կմտնեք ասպարեզ, նախապես մի կռվեք, այլ քշեցեք

ձիերը այստեղ-այնտեղ, թերևս խղճա թագավորը և չթողնի կռվել։ Այս խրատը ճիշտ ընդունեց Բայանդուրը (հայը)։ Իսկ կայենաման վրաց ազգը գաղտնի խրատ տվեց Շիշուշին (վրացուն), թե դու փոքրահասակ ես և թույլ, իսկ Բայանդուրը հաղթամարմին է ու զորեղ, դու չես կարող կռվել նրա դեմ։ Ուստի երբ նա ձիով խաղա անի, դու ջանա միզակով հարվածել նրան, թերևս կարողանաս նրան գետնին գցել։

Բայանդուրը Շիշուշին առաջեց, իսկ սա նրա հետևից մտավ թամբի մեջ և միզակը ուղղեց Բայանդուրին ու գեղարդը մտցրեց Բայանդուրի փորը, պորտի տակից թափանցեց մյուս կողմը, մսի և մորթու մեջ անցավ գեղարդը։ Իսկ Բայանդուրը մտրակեց երիվարը, շեշտակի հասավ նրան և լախտով հարվածեց նրա պարանոցին, և նա ձիուց կախվեց։ Կամենում էր նորից հարվածել, բայց քանի որ լախտի բռնակը արյամբ շաղախված էր, պոկվեց նրա ձեռքից։ Հանեց թուրը, որ հարվածի նրան, բայց Շիշուշը խելագարված էր, ընկավ գետնին, իսկ Բայանդուրը թուրը վրա բերեց ու խփեց ձիու պոչը արմատից կտրեց։ Մահմեդականները ընկան Շիշուշի վրա և չթողին, որ նրան սպանի։ Ապա հայերն ու մահմեդականները խառնիխուռն ելան գնացին հիացած բարձրացրին Բայանդուրին և բերին իշխանի մոտ։ Իշխանը պատվիրեց բժիշկներին բուժել նրան։

(Իշխանը) անչափ սիրեց նրան։ Հրամայեց, որ հետևյալ օրը Շիշուշին հանեն և հող առ հող մանրեն ու գցեն շներին։ Նա Քրիստափոր անունով մի արեղա եղբայր ուներ, որ թագուհու խոստովանահայրն էր։ Սա գնաց աղաչեց նրան (թագուհուն) իր եղբոր փրկության համար։ Իսկ նա (թագուհին) աղաչեց իր ամուսնուն, ուստի չսպանին նրան։ Սակայն ինչ որ Շիշուշն ուներ՝ ծառա, աղախին, գյուղ, այգի, անասուն և այլ ամենը, ինչ որ նա ուներ, հրամայեց ամբողջը զրոյն հանձնել Բայանդուրին։ Արին ըստ նրա հրամանի։ Այստեղ վրացիները մի փոքր կոտորվեցին իրենց գոռոգությունից։

Հայերը նախատինքի երգեր հորինեցին նրանց լեզվով ամեն տան (երգի) ավարտին ասում էին՝ Շիշուշ, ծաղի, Բայանդուր մսուղա, այսինքն՝ Շիշուշ, փախիր, Բայանդուրն է գալիս։ Երբ հայ մանուկները այս երգում էին, վրացիները ամոթահարվում էին։ Սանի